



## PRAKATA

Kerajaan MADANI secara berterusan merealisasikan pertumbuhan negara yang stabil sejak 2022. Momentum pertumbuhan pada separuh pertama 2024 bertumbuh pesat kepada 5.1%. Kerajaan menjangkakan pertumbuhan yang kukuh bagi 2024 iaitu di ambang 4.8% dan 5.3%, didorong oleh permintaan domestik yang teguh serta peningkatan dalam sektor perdagangan dan pelaburan. Sementara itu, rizab antarabangsa kekal mencukupi dengan pengukuhan ringgit berbanding dolar AS yang mengatasi prestasi kebanyakan mata wang di rantau ini, manakala momentum positif pasaran ekonomi kekal melonjak dengan sentimen pasaran global yang memberangsangkan. Ini mencerminkan persekitaran pasaran dan iklim pelaburan yang menggalakkan untuk terus menyokong pertumbuhan ekonomi negara.



**MENTERI KEWANGAN  
MALAYSIA**

Ketahanan kita bertunjangkan kepada asas ekonomi yang kukuh dan pembaharuan strategik yang terus menyokong kemajuan ke arah masa hadapan. Ini membuktikan keberkesanan usaha kerjasama Kerajaan dengan pelbagai pihak untuk menggapai wawasan strategik di bawah kerangka Ekonomi MADANI serta pelaksanaan Pelan Hala Tuju Peralihan Tenaga Negara, Pelan Induk Perindustrian Baharu 2030 dan Strategi Semikonduktor Nasional. Kerangka ini telah meletakkan asas yang kukuh untuk memajukan negara dan penting bagi memacu Malaysia ke arah ekonomi yang mempunyai nilai tambah yang tinggi. Tatkala kita mendepani cabaran, trajektori ekonomi negara terus mencerminkan kekuatan dan kebolehsuaian dasar-dasar kita, seterusnya mempamerkan kelebihan daya saing negara.

Ikhtiar pembaharuan bersepadu yang dilaksanakan oleh Kerajaan berjaya meningkatkan keyakinan pelabur dan dibuktikan melalui peningkatan prospek pelaburan yang memberangsangkan. Jumlah pelaburan yang diluluskan melonjak sebanyak 18% kepada RM160 bilion bagi tempoh separuh pertama 2024. Di samping itu, di bawah program GEAR-uP, syarikat pelaburan berkaitan kerajaan telah diperkasa untuk memacu pertumbuhan domestik melalui pelaburan langsung domestik bersasar melibatkan RM120 bilion dalam tempoh lima tahun akan datang. Kerajaan juga menjangkakan pelaburan asing turut membawa masuk pengetahuan teknologi termaju, manakala pelaburan domestik pula akan terus menyokong industri tempatan, khususnya PKS, dalam membangunkan dan meningkatkan keupayaan operasi serta jaringan perniagaan. Pendekatan ini sekali gus akan melengkapkan usaha Kerajaan dalam mempertingkatkan daya saing, memacu pertumbuhan ekonomi serta mewujudkan peluang pekerjaan yang berkualiti tinggi.

Hatta, Kerajaan beriltizam untuk bekerjasama dengan sektor swasta melalui pendekatan seluruh negara, demi memastikan Malaysia berada di barisan hadapan ekonomi global. Perkhidmatan awam yang cekap adalah antara tonggak utama dalam mengangkat martabat negara. Sehubungan itu, Kerajaan MADANI komited untuk memperkasa penyampaian perkhidmatan awam serta tata kelola bagi memenuhi keperluan komuniti pelaburan dan perniagaan, di samping memudah cara urusan perniagaan dalam negara. Bagi menambah baik produktiviti perkhidmatan awam, sistem saraan perkhidmatan awam yang baharu telah diperkenalkan. Sementara itu, usaha membanteras rasuah akan terus menjadi agenda utama dalam memastikan ketelusan, akauntabiliti dan integriti pada semua peringkat. Pada masa yang sama, pendigitalan juga akan berperanan sebagai pemangkin utama untuk mengurangkan birokrasi, menambah baik proses dan meningkatkan kecekapan merentasi semua sektor.

Dasar fiskal Malaysia kekal teguh pada landasan konsolidasi, dengan matlamat untuk membina semula penampakan fiskal serta memperkukuh daya tahan kewangan negara. Kerajaan terus mempergiat pelaksanaan pelbagai langkah peningkatan hasil secara berkesan, di samping memastikan pembaharuan fiskal tersebut dilaksanakan tanpa menjejaskan kelangsungan perniagaan atau menambah beban yang dikendong oleh rakyat. Pada masa yang sama, perbelanjaan negara akan terus diurus secara cermat melalui amalan fiskal berhemat, demi memastikan khazanah negara diagihkan dengan cekap, selaras dengan keutamaan strategik ekonomi Malaysia. Dalam hal ini, pelaksanaan e-Invois secara khusus adalah penting dalam mengekang pengelakan cukai serta membendung ketirisan kewangan negara, manakala penyasaran semula subsidi terus dilaksanakan demi memastikan pengurusan perbelanjaan awam berada pada tahap optimum. Pembaharuan fiskal yang sedang dilaksanakan secara berterusan telah meletakkan negara pada landasan yang tepat dalam merapatkan jurang defisit fiskal, yakni daripada 5.6% pada 2022 kepada 5% pada 2023, dan sasaran unjuran lebih baik kepada 4.3% pada 2024 dan 3.8% pada 2025. Kerajaan terus beriltizam untuk mengekalkan momentum ini demi memastikan kemajuan yang berterusan ke arah konsolidasi fiskal.

Teras utama pengislahan fiskal negara adalah melalui penggubalan Akta Kewangan Awam dan Tanggungjawab Fiskal 2023 yang berkuat kuasa pada 1 Januari 2024. Perundangan bersejarah ini mendukung prinsip MADANI, yakni ketelusan, akauntabiliti dan tata kelola yang baik, sekali gus menjadi asas kepada usaha pembaharuan fiskal yang menyeluruh. Kesungguhan merencana pengukuhan tata kelola turut dizahirkan menerusi penerbitan penyata prabelanjawan serta laporan prestasi perbelanjaan pertengahan tahun. Di samping itu, Kerajaan terus giat membangunkan kapasiti yang diperlukan untuk menerbitkan penyata perbelanjaan cukai serta penyata risiko fiskal dalam waktu terdekat mencerminkan keazaman Kerajaan untuk memperhebat ketelusan fiskal. Dalam hal ini, usaha tersebut bukan sahaja mengembalikan keyakinan rakyat dan pelabur, malah melonjakkan Malaysia ke persada antarabangsa, seterusnya mengukuhkan kedudukan negara sebagai sebuah kuasa ekonomi yang dinamik dan berdaya tahan.

Dalam kita melakar masa hadapan, Belanjawan 2025 bukanlah semata-mata untuk menoktahkan Rancangan Malaysia Kedua Belas. Ia juga akan menjadi landasan untuk terus memacu era baharu pertumbuhan dan inovasi bagi Rancangan Malaysia Ketiga Belas. Kerajaan juga bertekad untuk merangka pembangunan ekonomi negara yang lebih kukuh dan inklusif bagi menterjemahkan aspirasi setiap rakyat Malaysia, di samping melindungi kesejahteraan rakyat serta meningkatkan kemakmuran negara. Bagi mencapai wawasan ini, kita harus mengadaptasi pendekatan terangkum yang melibatkan seluruh negara, menggembelng sokongan pelbagai lapisan rakyat dan masyarakat dalam misi mencapai pembangunan negara yang berimpak besar serta kemajuan ekonomi yang transformatif.

Marilah bersama-sama kita menggembelng kekuatan, memperteguh iltizam, dan melangkah maju ke hadapan. Zahirkan komitmen yang tidak berbelah bahagi, sehati sejiwa, agar wawasan ini menjadi suatu realiti, sekali gus memacu Malaysia menjadi kuasa ekonomi terulung di Asia seperti hasrat di bawah kerangka Ekonomi MADANI.



**ANWAR IBRAHIM**  
18 Oktober 2024